

七十二家集

魏文帝集卷之六

魏文帝曹丕子桓著

令

答劉廙等令

天下重器王者正統以聖德當之猶有懼心吾
何人哉且公卿未至乏主斯豈小事且宜以待
固讓之後乃當更議其可耳

劉廙等勸進附

臣等聞聖帝不違時明主不逆人故易稱通

天下之志斷天下之疑伏惟陛下體有虞之
上聖承土德之行運當亢陽明夷之會應漢
氏祚終之數合契皇極同符兩儀是以聖瑞
表徵天下同應歷運去就深切著明論之天
命無所與議比之時宜無所與爭故受命之
期時清日晏曜靈施光休氣雲蒸是乃天道
悅懌民心欣戴而仍見閉拒於禮何居且群
生不可一日無主神器不可以斯湏無統故
臣有違君以成業下有矯上以立事臣等敢

不重以死請

答蘇林等令

凡斯皆宜聖德故曰苟非其人道不虛行天瑞
雖彰頌德而光吾德薄之人胡足以當之今讓
董兒聽許外內咸使聞知

蘇林等表附

天有十二次以爲分野王公之國各有所屬
周在鶉火魏在大梁歲星行歷十二次國天
子受命諸侯以封周文王始受命歲在鶉火
至武王伐紂十三年歲星復在鶉火故春秋

傳曰武王伐紂歲在鶉火歲之所在卽我有
周之分野也昔光和七年歲在大梁武王始
受命爲時將討黃巾是歲改年爲中平元年
建安元年歲復在大梁始拜大將軍十三年
復在大梁始拜丞相今二十五年歲復在大
梁陛下受命此魏得歲與周文王受命相應
今年青龍在庚子詩推度災曰庚者更也子
者滋也聖命天下治又曰王者布德於子治
成於丑此言今年天更命聖人制治天下帝

總於民也魏以改制天下與時協矣顓頊受
命歲在豕韋衛居其地亦在豕韋故春秋傳
曰衛顓頊之墟也今十月斗之建則顓頊受
命之分也始魏以十月受禪此同符始祖受
命之驗也魏之氏族出自顓頊與舜同祖見
于春秋世家舜以土德承堯之火今魏亦以
土德承漢之火於行運會於堯舜授受之次
臣聞天之去就固有常分聖人當之昭然不
疑故堯捐骨肉而禪有虞終無恡色舜發龍

畝而君天下若固有之其相受授間不替漏
天下已傳矣所以急天命天下不可一日無
君也今漢期運已終妖異絕之已審陛下受
天之命符瑞告徵丁寧詳悉反覆備至雖言
語相喻無以代此今旣發詔書璽綬未御固
執謙讓上逆天命下違民望臣謹按古之典
籍參以圖緯魏之行運及天道所在卽尊之
驗在於今年此月昭晰分明唯陛下遷思易
慮以時卽位顯告天帝而告天下然後改正

朔易服色正大號天下幸甚

答華歆等令

以德則孤不足以時則戎虜未滅若以群賢之
靈得保首領終君魏國於孤足矣若孤者胡足
以辱四海至乎天瑞人事皆先王聖德遺慶孤
何有焉是以未敢聞命

華歆等勸進附

臣等被召到伏見太史丞許芝左中郎將李
伏所上圖讖符命侍中劉廙等宣叙衆心大
靈同謀又漢朝知陛下聖化通于神明聖德

參于虞夏因瑞應之備至聽歷數之所在遂
獻璽綬固讓尊號能言之倫莫不抃舞河圖
洛書天命瑞應人事協于天時民言協于天
叙而陛下性秉勞謙體尚克讓明詔懇切未
肯聽許臣妾小人莫不伊邑臣等聞自古及
今有天下者不常在乎一姓考以德勢則盛
衰在乎彊弱論以終始則廢興在乎期運唐
虞歷數不在厥子而在舜禹舜禹雖懷克讓
之意迫群后執玉帛而朝之兆民懷欣戴而

歸之率土揚歌謠而詠之故其守節之拘不
可得而常處達節之權不可得而久避是以
或遜位而不恡或受禪而不辭不吝者未必
厭皇寵不辭者未必渴帝祚各追天命而不
得以已旣禪之後則唐氏之子爲竄于有虞
虞氏之胄爲客于夏代然則禪代之義非獨
受之者實應天福授之者亦與有餘慶焉漢
自章和之後世多變故稍以陵遲泊乎孝靈
不恤其心虐賢害仁聚歛無度政在嬖豎視

民如讐遂令上天震怒百姓從風如歸當時
則四海聞涕既沒則禍發宮庭寵勢並竭帝
室逢卑若在帝舜之末節猶擇聖代而授之
荆人抱玉漢猶思良工而刊之况漢國既往
莫之能匡推器移君委之聖哲固其宜也漢
朝委質既願禪禮之速定也天祚率土必將
有王王率土者非陛下其孰能任之所謂論
德無與爲比考功無推讓矣天命不可久稽
民望不可久違臣等悽悽不勝大願伏請陛

下割攜謙之志脩受禮之禮因人神之意
外內之願

又答相國歆等令

昔者太舜飯糗茹草將終身焉斯則孤之前志也及至承堯禪被珍裘妻二女若固有之斯則順天命也群公卿士誠以天命不可拒民望不可違孤亦曷以辭焉

相國龍等又勸進附

臣等伏讀詔書於邑益甚臣等聞易稱聖人奉天時論語云君子畏天命天命有去就然後帝者有禪代是以唐之禪虞命在爾躬虞

之順唐謂之受終堯知天命去已故不得不
禪舜舜知歷數在躬故不敢不受不得不禪
奉天時也不敢不受畏天命也漢朝雖承季
末陵遲之餘猶務奉天命以則堯之道是以
願禪帝位而歸二女而陛下正於大魏受命
之初抑虞夏之達節尚延陵之讓退而所枉
者大所直者小所詳者輕所略者重中人凡
士猶爲陛下陋之沒者有靈則重華必忿憤
於蒼梧之神墓大禹必鬱悒於會稽之山陰

武王必不悅於商陵之玄宮矣是以臣等敢以死請且漢政在閭官祿去帝室七世矣遂集矢石於其宮殿而二京爲之丘墟當是之時四海蕩覆天下分崩武王親衣甲而冠胄沐雨而櫛風爲民請命則活萬國爲世撥亂則致升平鳩民而立長策宮而置吏元元無過罔於前業而始有造於華夏陛下卽位光昭文德以翊武功勤恤民隱視之如傷懼者寧之勞者息之寒者以暖饑者以克遠人以

恩復寇敵以恩降邁恩種德光被四表稽古
篤睦茂于放勛網漏吞舟弘乎周文是以布
政未替人神並和皇天則降甘露而臻四靈
后土則植芝草而吐醴泉虎豹鹿兔皆素其
色雉鳩燕雀亦白其羽連理之木同心之瓜
五采之魚珍祥瑞物雜沓於其間者無不畢
備古人有言微禹吾其魚乎微大魏則臣等
之白腎交橫于曠野矣伏省群目外內前後
章奏所以陳叙陛下之符命者莫不條河洛

之圖書據天地之瑞應因漢朝之款詆宣萬
方之景附可謂信矣省矣三王無以及五帝
無以加民命之懸於魏政三十有餘年矣此
乃千世時至之會萬載一遇之秋達節廣度
宜昭於斯際拘牽小節不施於此時久稽天
命罪在臣等輒營壇場具禮儀擇吉日昭告
昊天上帝秩群神之禮湏禋祭畢會群寮於
朝堂議年號正朔服色當施行

薄稅令

關津所以通商旅池苑所以禦災荒設禁重稅
非所以便民其除池籞之禁輕關津之稅皆復
什一

復樵租稅令

先王皆樂其所生禮不忘其本樵霸王之邦真人本出其復樵租稅二年

以鄭稱爲武德傳令

龍淵太阿出昆吾之金和氏之璧由井里之田
礱之以砥礪錯之以他山故能致連城之價爲
命世之寶學亦人之砥礪也稱篤學大儒勉以
經學輔侯宜旦夕入侍曜明其志

廣詢令

軒轅有明臺之議放勛有衢室之問皆所以廣
詢于下也百官有司其務以職盡規諫將率陳
軍法朝士明制度收守申政事縉紳考六藝吾
將兼覽焉

問雍州刺史張旣令

蘇則爲金城太守西平麴演叛則勒兵討之演乞降文帝時襲王位令問旣旣答之加則護邊校尉賜爵關內侯後演復結旁郡爲亂則誘斬之

試守金城太守蘇則旣有綏民平夷之功聞又出軍西定湟中爲河西作聲勢吾甚嘉之則之功效爲可加爵邑未邪封爵重事故以問卿客白意且勿宣露也

張旣答魏王附

金城郡昔爲韓遂所見屠剥死喪流亡或竄

戎狄或陷寇亂戶不滿五百則到官內撫彫
殘外鳩離散今見千餘又梁燒雜種羌昔與
遂同惡遂斃之後越出障塞則前後招懷歸
就郡者三千餘落皆卹以威恩爲官効用西
平趙演等倡造邪謀則尋出軍臨其項領演
卽歸命送質破絕賊糧則既有卹民之效又
能和戎狄盡忠効節遭遇聖明有功必錄若
則加爵邑誠足以勸忠臣勵風俗也

魏文帝集卷之七

魏文帝薨太子阮著

策

追封鄧公策

惟黃初二年八月丙午皇帝曰咨爾鄧哀侯冲
昔皇天鍾美於爾躬俾聰哲之才成於弱年當
永享顯祚克成厥終如何不祿早世天昏朕承
天序享有四海並建親親以藩王室惟爾不逮
斯榮且葬禮未備追悼之懷愴然攸傷今遷葬

于高陵使使持節兼謁者僕射郎中陳承追賜
號曰鄧公嗣以大牢醢而有靈休茲寵榮

謚龐德策

昔先軫喪元王蠲絕脰隕身殉國代夫之惟
疾式昭果毅躋難成名聲溢當時義高在昔寡
人愍焉謚曰壯疾

策孫權九錫文

蓋聖王之法以德設爵以功制祿勞大者祿厚
德威者禮豐故叔旦有夾輔之勲太公有鷹揚
之功並啟土宇并受備物所以表章元功殊異
賢哲也近漢高祖受命之初分裂膏腴以王八
姓斯則前世之懿事後王之元龜也朕以不德
承運革命君臨萬國秉統天機思齊先代坐而
待旦惟君天資忠亮命世作佐深覩歷數達見
廢興遠遣行人浮于潛漢望風影附抗疏稱藩

兼納織絳南方之貢普遣諸將來還本朝忠肅
內發款誠外昭信著金石義蓋山河朕甚嘉焉
今封君爲吳王使使持節太常寺平侯貞授君
璽綬策書金虎符第一至第五左竹使符第一
至第十以大將軍使持節督交州領荊州牧事
錫君青土苴以白茅對揚朕命以尹東夏其上
故驃騎將軍南昌侯印綬符策今又加君九錫
其敬聽後命以君綏安東南綱紀江外民夷安
業無或攜貳是用錫君大輅戎輅各一玄牡二

駟君務財勸農倉庫盈積是用錫君衮冕之服
赤舄副焉君化民以德禮教興行是用錫君輅
縣之樂君宣導休風懷柔百越是用錫君朱戶
以居君運其才謀官方任賢是用錫君納陛以
登君忠勇並奮清除姦慝是用錫君虎賁之士
百人君振威陵邁宜力荆南梟滅凶醜罪人斯
得是用錫君缺鉞各一君文和於內武信於外
是用錫君彤弓一彤矢百旅弓十旅矢千君以
忠肅爲基恭勤爲德是用錫君秬鬯一鹵圭瓚

副焉欽哉敬敷訓典以服朕命以勗和我國家
永終爾顯烈

以孫登爲東中郎封侯箕

蓋河洛爲天意符讖述聖心昭晰著明與天談
也故易曰河出圖洛出書聖人則之孫將軍歸
心國朝忠亮之節同功佐命而其子當爲魏將
軍著在圖讖猶漢光武受命李氏爲輔王梁孫
咸並見符緯也斯乃皇天啟祐大魏永令孫氏
仍世爲佐其以登爲東中郎將封縣侯萬戶昔
周嘉公旦祚流七胤漢禮蕭何一門十侯今孫
將軍亦當如斯若夫長平之榮安豐之寵方斯

魏文帝集

卷七

五

茂如

教

答卞蘭教

賦者言事類之因附也頌者美盛德之形容也
故作者不虛其辭受者必當其實蘭此賦豈吾
實哉昔吾丘壽王一陳寶鼎何武等徒以歌頌
猶受金帛之賜蘭事雖不諒義足嘉也今賜牛
一頭

卞蘭贊述太子表附

伏惟太子研精典籍留思篇章覽照幽微才

不世出稟聰叡之絕性體明達之殊風慈孝
發於自然仁恕洽於無外是以武夫懷恩文
士歸德竊兄所作典論及諸賦頌逸句爛然
沈思泉涌華藻雲浮聽之忘味正使聖人後
存猶稱善不暇所不能間也昔舜以烝烝顯
其德周旦以不驕成其名豈因南面之尊以
發稱假鼎足之盛以取譽哉夫至尊至貴能
令人畏不能令人譽故策不能變龍逢之心
紂不能易三仁之意懷近服遠非德無施今

太子博約多容海濔無時學無常師唯德所
在思無所思唯德所親觀士察人毫毛無失
望色則知其情覽始則達其終遇僞辯於未
言絕讒巧於未形其所以包羅殊類鑑觀成
敗德生於性明出自然太子所行晏然休著
皆群下所常吟詠誠不復須臣贊揚懿美褒
稱盛行然後令夜光之璧顯於金匱隋侯之
珠彰於韞櫝者也今相鍾繇大理王朗海內
英儒國家柱臣博物多識通洽君子年耆德

茂所更多矣若游海者難與論水覩前世者
不可爲言然咸歸太子巍巍之美叙述清風
言之有承聽者欣欣忘日之夕流景耀於無
窮布芳陰於四遠譬則麟龍發足辟獸追蹤
鸞鳳舉翼衆鳥隨風小臣區區嘉樂無已竊
怡綿綿之屬忘愚戇之言謹觸冒上賦一篇
以攄狂狷之思

下蘭贊述太子賦附

超古人之遐迹崇先聖之弘基耽八素之秘

與遵二儀於大猷正往昔之常弊定當世之
舊儀稟休和之上性應五百之運期著典憲
之高論作叙懽之麗詩越文章之常檢揚不
學之妙辭蹈布衣之所難闡善道而廣之道
無深而不測術無細而不敷論古賢以歎息
覩懿德以歡娛歷精思於訓籍忽日移而忘
劬雖明略而無上猶博納以自扶賓故老以
勸俗諷六經以崇儒嘉通人之達節笑俗士
之守株匿天威之嚴厲揚愷悌之和舒惟凡

百之詠德感恩惠之有餘信清風之休著非
臣下之敢虛乃作頌曰明明太子旣敎且聰
博聞強記聖思無雙倚之左右如虎如龍八
俊在側旁無諛訥富不忘施尊而益恭研精
書籍留思異同建計立議廓然發蒙天下延
頸歌頌德音聞之於古見之於今深不可測
高不可尋創法萬載乘此休風

表

讓禪表

皇帝陛下奉被今月乙卯璽書伏聽冊命五內
驚震精爽散越不知所處臣前上還相位退守
藩國聖恩聽許臣雖無古人量德度身自定之
志保已存性實其私願不竊陛下猥損過謬之
命發不世之詔以加無德之臣且聞堯禪重華
舉其克諧之德舜授文命采其齊聖之美猶下
咨四嶽上觀璿璣今臣德非虞夏行非二君而

承歷數之諮應選授之命內自揆撫無德以稱
且許由匹夫猶拒帝位善卷布衣而逆虞詔臣
雖鄙蔽敢忘守節以當大命不勝至願謹拜章
陳情使行相國永壽少府龔士臣毛宗奏并上
璽綬

漢帝禪詔附

惟延康元年十月乙卯皇帝曰咨爾魏王夫
命運否泰依德升降三代卜年著於春秋是
以天命不于常帝王不一姓由來尚矣漢道

陵遲爲日已久安順已降世失其序冲質短
祚三世無嗣皇綱肇虧帝典頽沮暨于朕躬
天降之災遭無妄厄運之會值炎精幽昧之
期變興輦轂禍由閹宦董卓乘釁惡甚澆獍
刼遷省御太僕宮廟遂使九州幅裂疆敵虎
爭華夏鼎沸蝮蛇塞路當斯之時尺土非復
漢有一夫豈復朕民幸賴武王德膺符運奮
揚神武芟蕘兇暴清定區夏保乂皇家今王
纘承前緒至德光昭御衡不迷布德優遠聲

教被四海仁風扇鬼區是以四方効珍人神
響應天之歷數實在爾躬昔虞舜有大功二
十而放勛禪以天下大禹有疏導之績而重
華禪以帝位漢承堯邕有傳聖之義加順靈
祇紹天明命釐降二女以嬪于魏使使持節
行御史大夫事太常音奉皇帝璽綬王其永
君萬國敬御天威允執其中天祿永終敬之
哉

讓禪第二表

奉今月戊戌璽書重被聖命伏聽冊告肝膽戰
悸不知所措天下神器禪代重事故堯將禪舜
納于大麓舜之命禹玄圭告功烈風不迷九州
攸平詢事考言然後乃命而猶執謙讓于德不
嗣况臣頑固質非二聖乃應天統受終明詔敢
守微節歸志箕山不勝大願謹拜表陳情使并
奉上璽綬

漢詔附

皇帝問魏王言遣宗奉庚申書到所稱引聞
之朕惟漢家世踰二十年過四百運周數終
行祚已訖天心已移兆民望絕天之所廢有
自來矣今大命有所底止神器當歸聖德違
衆不順逆天不祥王其體有虞之盛德應歷
數之嘉會是以禎祥告符圖讖表錄神人同
應受命咸宜朕畏上帝致位于王天不可違
衆不可拂且重華不逆堯命大禹不辭舜位
若夫由卷匹夫不載聖籍固非皇材帝器所

當稱慕今使音奉皇帝璽綬王其陟帝位無
逆朕命以祗奉天心焉

讓禪第三表

臣聞舜有賓于四門之勲乃受禪于陶唐禹有
存國七百之功乃承祿于有虞臣以蒙蔽德非
二聖猥當天統不敢聞命敢屢抗疏略陳私願
庶章通紫庭得全微節情達宸極永守本志而
音重復銜命申制詔臣臣實戰惕不發璽書而
音迫於嚴詔不敢復命願陛下馳傳騁驛召音
還臺不勝至誠

漢詔附

天訖漢祚辰象著明朕祗天命致位于王仍
陳歷數於詔冊喻符運於翰墨神器不可以
辭拒皇位不可以謙讓稽于天命至於再三
且四海不可以一日曠王萬機不可以斯湏
無統故建大業者不拘小節知天命者不繫
細物是以舜受大業之命而無遜讓之辭聖
人達節不亦遠乎今使音奉皇帝璽綬王其
欽承以答天下嚮應之望焉

又漢帝答詔附

昔堯以配天之德秉六合之重德凝歷運之
數移於有虞委讓帝位忽如遺跡今天既訖
我漢命乃眷北顧帝皇之業實有大魏朕守
空名以竊古義顧視前事猶有慙德而王遜
位至于三四朕用懼焉夫不辭萬乘之位者
知命達節之數也虞夏之君處之不疑故勲
烈垂于萬載美名傳于無窮今遣守尚書令
侍中顓喻王其速陟帝位以順天人心副
朕之大願

又尚書令桓階等奏登壇日期附

今漢氏之命已四至而陛下前後固辭臣等
伏以爲上帝之臨聖德期運之隆大魏斯豈
數載傳稱周之有天下非甲子之朝殷之去
帝位非牧野之日也故詩序商湯追本玄王
之至述姬周上錄后稷之生是以受命旣固
厥德不回漢氏衰廢行次已絕三辰垂其徵
史官著其驗耆老記先古之占百姓協歌謠
之聲陛下應天受禪當速卽壇場柴燎上帝

誠不宜久停神器拒億兆之願臣輒下太史
令擇元辰今月二十九日可登壇受命請詔
王公群卿具條禮儀別奏

魏文帝集卷之八

魏文帝曹丕子桓著

書

與吳質書

質爲朝歌長遷元城令太祖西
征太子南在孟津小城與質書

五月二十八日丕白季重無恙塗路雖局官守
有限願言之懷良不可任足下所治僻左書問
致簡益用增勞每念昔日南皮之游誠不可忘
旣妙思六經逍遙百氏彈碁間設終以博奕高

談娛心哀寧順耳馳騫北場旅食南館浮耳瓜
於清泉沈朱李於寒水白日旣匿繼以朗月同
乘並載以游後園輿輪徐動賓從無聲清風夜
起悲筵微吟樂往哀來愴然傷懷余顧而言斯
樂難常足下之徒咸以爲然今果分別各在一
方元瑜長逝化爲異物每一念至何時可言方
今糴賓紀時景風扇物天意和暖衆果具繁時
駕而遊北遵河曲從者鳴笳以啟路文學託乘
於後車節同時異物是人非我勞如何今遣騎

到鄴故使枉道相遇行矣自愛丕白

又與吳質書

魏志云阮瑀以十七年卒徐幹陳琳
瑒劉楨以二十二年卒質時爲元城令

太子
與書

二月三日丕白歲月易得別來行役四年三年
不見東山猶歎其遠况又過之思何可支雖書
疏往返未足解其勞結昔年疾疫親故多離其
災徐陳應劉一時俱逝痛可言邪昔日游處行
則連輿止則接席何曾須臾相失每至觴酌流
行絲竹並奏酒酣耳熱仰而賦詩當此之時忽

然不自知樂也。謂百年已分，長共相保，何圖數年之間，零落略盡。言之傷心，頃撰其遺文，都爲一集，觀其姓名，已爲鬼錄。追思昔遊，猶在心目。而此諸子，化爲糞壤，可復道哉。觀古今文人，類不護細行，鮮皆能以名節自立。而偉長獨懷文抱質，恬淡寡欲，有箕山之志，可謂彬彬君子矣。著中論二十餘篇，成一家之業，辭義典雅，足傳於後。此子爲不朽矣。德璉常斐然有述作意，其才學足以著書，美志不遂，良可痛惜。間者歷覽

諸子之文對之枚淚旣痛逝者行自念也孔璋
章表殊健微爲繁富公幹有逸氣但未遒耳至
其五言詩妙絕當時元瑜書記翩翩致足樂也
仲宣獨自善於辭賦惜其體弱不足起其文至
於所善古人無以遠過也昔伯牙絕弦於鍾期
仲尼覆醢於子路愍知音之難遇傷門人之莫
逮也諸子但爲未及古人自一時之儁也今之
存者已不逮矣後生可畏來者難誣然吾與足
下不及見也行年已長大所懷萬端時有所慮

至乃通夕不眠何時復類昔日已成老翁但未
白頭耳光武言年已三十在軍十年所更非一
吾德雖不及年與之齊以大羊之質服虎豹之
文無衆星之明假日月之光動見瞻觀何時易
和恐永不復得爲昔日游也少壯真當努力年
一過往何可攀援古人思秉燭夜游良有以也
頃何以自娛頗復有所造述否東望於邑裁書
叙心丕白

吳質答魏太子牋附

二月八日庚寅臣質言奉讀手命追亡慮存
恩哀之隆形於文墨日月冉冉歲不與我昔
侍左右則坐衆賢出有微行之游入有管絃
之歡置酒樂飲賦詩稱壽自謂可終始相保
並騁材力効節明主何意數年之間死喪略
盡臣獨何德堪以久長陳徐劉應才學所著
誠如來命惜其不遂可謂痛切凡此數子於
雍容侍從實其人也若乃邊境有虞群下鼎
沸軍書輻至羽檄交馳於彼諸賢非其任也

往者孝武之世文章爲盛若東方朔枚臯之徒不根特論卽阮陳之儔也其惟嚴助壽王與聞政事然皆不愼其身善謀於國卒以敗亡臣竊恥之至於司馬長卿稱疾避事以著書爲務則徐生庶幾焉而今各逝已爲異物矣後來君子實可畏也伏惟所天優游典籍之場休息篇章之圃發言抗論窮理盡微摘藻下筆鸞龍之文奮矣雖年齊蕭王才實百之此衆議所以歸高遠近所以同聲也然年

歲若墜今質已四十二矣白髮生鬢所慮日
深實不復若平生之時也但欲保身勅行不
蹈有過之地以爲知己之累耳游宴之歡難
可再遇盛年一過實不可追臣幸得下愚之
才值風雲之會時適齒莖猶欲觸冒奮首展
其割裂之用也不勝悽悽以來命備悉故略
陳至情質死罪死罪

又與吳質書

初曹真曹休與質等俱在渤海游處及太子卽王位休真以宗親並受封爵出爲列將而質故爲長史王領質有望故稱二人以慰之

南皮之游存者三人烈祖龍飛或將或侯今惟
吾子棲遲下仕從我游處獨不及門銚罄囁恥
能無懷愧路不云遠今復相聞

吳質答魏王丕牋附

曹烈曹丹加以公室枝庶骨肉舊恩其龍飛
鳳翔實其分也

與鍾繇謝王玖書

太祖征漢中太子在孟津聞繇有王玖
審使臨淄侯因人說之繇遂送焉太子
與繇書

王白良玉比德君子珪璋見美詩人晉之垂棘
魯之璿璣宋之結緣楚之和璞價越萬金貴重
都城有稱疇昔流聲將來是以垂棘出晉虞虢
雙禽和璧入秦相如抗節竊見玉書稱美玉白
如截肪黑譬純漆赤擬雞冠黃侔蒸栗側聞斯
語未覩厥狀雖德非君子義無詩人高山景行

弘所慕仰然四寶邈焉已遠秦漢未聞有良比
也求之曠年不過厥其私願不果饑渴未副近
日南陽宗惠叔稱君侯昔有美玦聞之驚喜笑
與抃會當自白書恐傳言未審是以令舍弟子
建因荀仲茂時從容踰鄙旨乃不忽遺厚見周
稱鄴騎旣到寶玦初至捧匣跪發五內震駭繩
窮匣開爛然蒲目猥以蒙鄙之姿得覩希世之
寶不煩一介之使不損連城之價旣有秦昭韋
臺之觀而無蘭生詭奪之誑嘉貺益腆敢不欽

承謹奉賦一篇以讚揚麗質丕白

鍾繇報太子書附

昔忝近任并得賜玦尚方耆老頗識舊物名
其符采必得處所以爲執事有珍此者是以
鄙之用未奉貢幸而紆意實以悅懌枉昔和
氏殷勤忠篤而繇待命是懷愧耻

與鍾繇五執釜書

繇爲相國以五熟鼎範因太子鑄之釜成太子與繇書

昔有黃三鬴周之九寶咸以一體使調一味豈
若斯釜五味時芳蓋鼎之烹飪以饗上帝以養
聖賢昭德祈福莫斯之美故非大人莫之能造
故非斯器莫宜盛德今之嘉釜有逾茲美夫周
之尸臣宋之考父衛之孔悝晉之魏顆彼四臣
者並以功德勒名鐘鼎今執事寅亮大魏以隆
聖化堂堂之德於斯爲盛誠太常之所宜銘彝

器之所宜勒故作斯銘勒之金口庶可贊揚洪
美垂之不朽

與鍾繇九日送菊書

歲往月來忽復九月九日爲陽數而日月並應
俗嘉其名以爲宜於長久故以享宴高會是月
律申無射言群木百草無有射地而生惟芳菊
紛然獨榮非夫含乾坤之純和體芬芳之淑氣
孰能如此故屈平悲冉冉之將老思餐秋菊之
落英輔體延年莫斯之貴謹奉一束以助彭祖
之術

與鍾繇書

尚閑字仲茂爲太子文學掾時有甲乙婦論閑與鍾繇王朗袁渙議各不同文

帝與

繇書

袁王國士更爲唇齒苟閑勁悍往來銳師真君
侯之勍敵左右之深憂也

答鍾繇書

孫權稱臣太子書報繇
繇答書太子又答之

得報知喜南方至於荀公之廣談孫權之斌媚
執書嗟嘆不能離手若權復歸當折以汝南許
劭月旦之評權優游二國俯仰荀許亦已足矣
鍾繇答太子書附

臣同郡故司空荀爽言人當遺情愛我者一
何可愛憎我者一何可憎顧念孫權了更斌
媚

答繁欽書

披書歡笑不能自勝竒才妙伎何其善也頃守
宮王孫世有女曰瑣年始九歲夢與神通寤而
悲吟哀聲激切涉歷六載于今十五近者督將
具以狀聞是日轉延衆賢遂奏名倡曲極數彈
歡情未逞乃令從官引內世女湏臾而至厥狀
甚美素顏玄髮皓齒丹唇詳而問之云善歌舞
於是提袂徐進揚蛾微眺芳聲清激逸足橫集
然後脩容飾粧改曲變度斯可謂聲協鐘石氣

應風律今之妙舞莫巧於絳樹清歌莫激於宋
鵬豈能上亂靈祇下變庶物漂悠風雲橫厲無
方若斯也哉固非車子喉嚨長吟所能逮也吾
鍊色知聲雅應此選謹卜良日納之閑房

繁欽與太子牋附

正月八日壬寅領主簿欽死罪死罪近屢奉
牋不足自宣頃諸鼓吹廣求異伎時都尉薛
訪車子年始十四能喉嚨引聲與笳同音白
上呈見果如其言卽日故共觀試乃知天壤

之所生誠有自然之妙物也。潛氣內轉，哀音外激，大不抗，越細不幽，散聲悲舊，箏曲美常。均及與黃門鼓吹，溫調迭唱，迭和，喉所發音，無不響應，曲折沈浮，尋變入節，自初呈試中，間二句，胡欲傲其所不知，尚之以一曲，巧竭意，既已不能，而此孺子遺聲抑揚，不可勝窮。優游轉化，餘弄未盡，暨其清激悲吟，雜以怨慕，詠北狄之遐征，奏胡馬之長思，悽入肝脾，哀感頑豔，是時日在西隅，涼風拂衽，茵山

臨谿流泉東逝同坐仰歎觀者俯聽莫不泣
泣隕涕悲懷慷慨自左驥史炳簪嬪名倡能
識以來耳目所見食日詭異未之聞也竊惟
聖體兼愛好奇是以因賤先白委曲伏想御
聞必含餘懽冀事速訖旋侍允塵寓目階庭
與聽斯調宴喜之樂蓋亦無量欽死罪死罪

啁劉楨書

太子初賜楨廓落帶其後師死
欲借取爲像因書啁楨楨答之

夫物因人爲貴故在賤者之手不御至尊之側
今雖取之勿嫌其不及也

劉楨答太子書附

楨聞荆山之璞耀元后之寶隨侯之珠燭衆
士之好南垠之金登窈窕之首鼪貂之尾綴
侍臣之幘此四寶者皆伏朽壤之下潛污泥
之中而揚光千載之上發采疇昔之外亦皆

未能初自接於至尊也夫尊者所服卑者所脩也貴者所御賤者所先也故夏屋初成而大匠先立其下嘉禾始熟而農夫先嘗其粒恨積所帶無他玆飾若寶殊異尚可納也

答友人書

御覽作答劉先生意
義絕不相肖姑闕姓名

獲累紙之命兼美之貺他旣備善雙鉤尤玆前
後之惠非賢兄之貢則執事之貽也來若川流
聚成山積其克匱筭頓府藏者固已無數矣

與吳監書

中國珍果甚多且復爲說蒲萄當其朱夏涉秋
尚有餘暑醉酒宿醒掩露而食其而不備脆而
不酸冷而不寒味長汁多除煩解倦又釀以爲
酒其於麴蘖善醉而易醒道之固以流湊咽噍
况親食之邪南方有橘酢正裂人牙時有甜耳
卽遠方之果寧有匹者乎

與群臣論蜀錦書

前後每得蜀錦殊不相比適可訝而鮮卑尚復
不愛也自吾所織如意虎頭連璧錦亦有金薄
蜀薄來至洛邑皆下惡是爲下工之物皆有虛
名

與群臣論被服書

三世長者知被服五世長者知飲食此言被服
飲食難曉也夫珍玩必中國夏則縑總綃總其
白如雪冬則羅紵綺縠衣疊鮮文未聞衣布服

舊道

與朝臣論抗稻書

江表惟長沙名有好米何得比新城抗稻邪上
風吹之五里聞香